

21 AUG 1997

Li Peng-Hubungan

LI PENG HARAP TINGKATKAN HUBUNGAN CHINA-MALAYSIA

KUALA LUMPUR, 21 Ogos (Bernama) -- Perdana Menteri China Li Peng yang tiba hari ini untuk melakukan lawatan rasmi empat hari ke Malaysia, melahirkan harapan agar hubungan persahabatan dan persefahaman antara China dan Malaysia akan dapat dipertingkatkan lagi.

"Lawatan saya ke Malaysia ini merupakan lawatan yang bercorak persahabatan dan kerjasama," kata Li dalam kenyataan yang dikeluarkan semasa ketibaan beliau di lapangan terbang Sultan Abdul Aziz Shah di Subang dekat sini.

"Saya berharap untuk pertukar-tukar pendapat secara mendalam dengan Perdana Menteri Malaysia Datuk Seri Dr Mahathir Mohamad dan pemimpin Malaysia yang lain mengenai hubungan dua hala dan isu kepentingan bersama."

Delegasi 117 anggota Li termasuklah isterinya Zhu Lin, Timbalan Ketua Setiausaha Majlis Negara He Chunlin, Menteri Industri Pembinaan Jentera Bao Xuding, Naib Menteri Luar Tang Jiaxuan dan pegawai-pegawai kanan kerajaan.

Ketibaannya di lapangan terbang itu disambut oleh Menteri Luar Datuk Seri Abdullah Ahmad Badawi dan Menteri Pembangunan Luar Bandar Datuk Annuar Musa, yang juga menteri pengiring.

"Saya juga ingin mengambil kesempatan ini untuk melihat sendiri kejayaan yang dicapai oleh Malaysia dalam beberapa tahun kebelakangan ini dalam pembangunan ekonomi dan sosialnya," katanya.

Beliau berkata China dan Malaysia merupakan jiran yang baik, dan rakyat kedua-dua negara pula menikmati hubungan yang mesra.

"Dalam beberapa tahun ini, hasil daripada usaha bersama kita, hubungan dua hala itu telah menyaksikan kemajuan yang pesat, seperti terbukti oleh pertukaran lawatan yang kerap antara pemimpin kedua-dua negara.

"Ia juga terbukti oleh hasil yang menggalakkan daripada kerjasama dalam bidang ekonomi, perdagangan, kebudayaan dan pendidikan serta pengukuhan hubungan persahabatan tradisional di antara rakyat kedua-dua negara," katanya.

Dari lapangan terbang itu Li dibawa dengan kereta ke Medan Parlimen untuk upacara sambutan rasmi.

Aturcara lawatan Li termasuk perbincangan dua hala dengan Dr Mahathir esok. -- BERNAMA

RAZ NMO